



ՀԵՌՈՒՍՏՍԵՍՈՒԹՅԱՆ ԵՎ ՌԱԴԻՈՅԻՆԱԶՆԱԺՈՂՈՎ

ՈՐՈՇՈՒՄ

14 հունիսի 2022 թվականի թիվ 102-Ա

ք. Երևան

«ՓԻ ԲԻ ՍԻ» ՍՊ ԸՆԿԵՐՈՒԹՅԱՆ ՆԿԱՏՄԱՍԲ ՀԱՐՈՒՑՎԱԾ ՎԱՐՉԱԿԱՆ ՎԱՐՈՒՅԹԸ ԿԱՐՃԵԼՈՒ ՄԱՍԻՆ

Հեռուստատեսության և ռադիոյի հանձնաժողովն (այսուհետ՝ Հանձնաժողով) ուսումնասիրելով դիմումի հիման վրա 2022 թվականի հունիսի 09-ին հարուցված թիվ 13 վարչական վարույթի նյութերը՝ *պարզեց*.

2022 թվականի հունիսի 09-ին Հանձնաժողով մուտքագրված «ՍՈՒԻԴ ՓԱՐԹՆԵՐ» ՍՊ ընկերության (այսուհետ՝ դիստրիբյուտոր) դիմում-գանգատում նշված է «ՓԻ ԲԻ ՍԻ» ՍՊ ընկերության (այսուհետ՝ Հեռարձակող) կողմից ոչ սեփական տեսալսողական հաղորդումներն առանց դրանց հեռարձակման իրավունքը հավաստող փաստաթղթերի հեռարձակելու փաստի վերաբերյալ:

Ըստ դիստրիբյուտորի՝ Հեռարձակողի կողմից առանց հեռարձակման իրավունքը հավաստող փաստաթղթերի 2022 թվականի ապրիլի 29-ին «Կինոման» տեսալսողական ծրագրով հեռարձակվել է АПГРЕЙД (UPGRADE 1x100 Ավստրալիա, 2018թ.), իսկ սույն թվականի մայիսի 14-ին՝ «Ֆիլմզոն» տեսալսողական ծրագրով՝ ИДЕАЛЬНЫЕ НЕЗНАКОМЦЫ (PERFECT STRANGERS 1x97 Իտալիա 2016թ.) ֆիլմերը (այսուհետ՝ Ֆիլմեր), որոնց Հայաստանի Հանրապետությունում տարածելու բացառիկ իրավունքը պատկանում է «ՍՈՒԻԴ ՓԱՐԹՆԵՐ» ՍՊ ընկերությանը: Դիստրիբյուտորը հայտնել է նաև, որ պայմանագրային պարտավորություն է կրում իրավատիրոջ հանդեպ՝ իր իրավունքները երրորդ անձանց խախտումներից պաշտպանելու ուղղությամբ:

Դիմում-գանգատում նշված է նաև, որ դիստրիբյուտորի և Հեռարձակողի միջև ոչ սեփական տեսալսողական հաղորդումների հեռարձակման իրավունքի տրամադրման լիցենզիոն պայմանագիր կնքված չէ, որը թույլ կտար Հեռարձակողին Հայաստանի Հանրապետության տարածքում հեռարձակել Ֆիլմերը և խնդրում է իրավախախտման հանգամանքը պարզելու դեպքում Հեռարձակողին ենթարկել համապատասխան պատասխանատվության:

Դիստրիբյուտորը Հանձնաժողով է ներկայացրել 2021 թվականի դեկտեմբերի 12-ին «PRINE TIME MEDIA LLC» ընկերության հետ կնքված բացառիկ լիցենզիոն պայմանագիրը, համաձայն որի Հայաստանի Հանրապետության տարածքում Ֆիլմերը տարածելու բացառիկ օգտագործման իրավունքը պատկանում է իրեն:

2022 թվականի հունիսի 20-ին դիստրիբյուտորը Հանձնաժողով է ներկայացրել Ֆիլմերի մի քանի րոպեանոց տևողությամբ տեսաձայնագրությունը: Հանձնաժողովն ուսումնասիրել է

Ֆիլմերի տեսաձայնագրությունը և պարզել, չնայած այն հանգամանքին որ այդ ձայնագրությունից պարզ չէ, թե որ օրվա հեռարձակում է, սակայն պարզ երևում է Ֆիլմերի ընթացքում Հեռարձակողի խորհրդանիշը:

Հանձնաժողովը ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի ա) կետով և հիմք ընդունելով դիստրիբյուտորի դիմումը՝ 2022 թվականի հունիսի 09-ին Հեռարձակողի նկատմամբ հարուցել է վարչական վարույթ:

Հանձնաժողովը հարուցված վարչական վարույթի մասին 2022 թվականի հունիսի 13-ին ծանուցել է Հեռարձակողին և հայտնել, որ այս հարցի վերաբերյալ կարող են ներկայացնել իրենց պարզաբանումները, բացատրությունները:

Վարչական վարույթի շրջանակներում Հեռարձակողը 2022 թվականի հուլիսի 12-ին Հանձնաժողով հասցեագրած իր պարզաբանման մեջ նշել է, որ 2022 թվականի հունվարի 03-ին «ՓԻ ԲԻ ՄԻ» ՍՊ ընկերության և «Tama Group Incorporated»-ի միջև կնքվել է Լիցենզիայի պայմանագիր, համաձայն որի վերջինս Հեռարձակողին է փոխանցել՝ «ИДЕАЛЬНЫЕ» НЕЗНАКОМЦЫ (PERFECT STRANGERS 1x97 Իտալիա 2016թ.) և АПГРЕЙД (UPGRADE 1x100 Ավստրալիա, 2018թ.) ֆիլմերի հեռարձակման իրավունքը:

Հեռարձակողը գրությանը կից ներկայացրել է 2022 թվականի հունվարի 03-ին «ՓԻ ԲԻ ՄԻ» ՍՊ ընկերության և «Tama Group Incorporated»-ի միջև կնքված Լիցենզիայի պայմանագրի պատճենը: Հեռարձակողը նաև խնդրել է կարճել 2022 թվականի հունիսի 09-ին հարուցված վարչական վարույթը:

Հանձնաժողովի հիմնավորումները (պատճառաբանությունը) և եզրահանգումը.

Այսպիսով, վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն ամրագրում է հետևյալը.

Փաստում ենք, որ Հանձնաժողովի 2020 թվականի սեպտեմբերի 18-ի թիվ 109-Ա որոշմամբ «ՓԻ ԲԻ ՄԻ» ՍՊ ընկերությունը հեղինակագործվել է (ՀՎ N 020) և վերջինիս տրվել է տեսալսողական մեդիաձառայություն մատուցողի կարգավիճակ:

«Տեսալսողական մեդիայի մասին» օրենքի 10-րդ հոդվածի 3-րդ մասի համաձայն՝ ոչ սեփական տեսալսողական հաղորդումները կարող են հեռարձակվել միայն դրանց հեռարձակման իրավունքը հավաստող փաստաթղթերի առկայության դեպքում:

«Հեղինակային իրավունքի և հարակից իրավունքների մասին» օրենքի 65-րդ հոդվածի 1-ին մասի համաձայն՝ սույն օրենքով պահպանվող ստեղծագործության կամ դրա էական մասի կամ հարակից իրավունքների օբյեկտի ցանկացած օգտագործում անօրինական է, եթե նախապես, մինչև նման օգտագործումը ձեռք չի բերվել հեղինակային իրավունքի կամ հարակից իրավունքների իրավատիրոջ թույլտվությունը:

Ստեղծագործության էական մաս է համարվում ստեղծագործության որևէ մասը, որը տվյալ ստեղծագործությանը ծանոթ ցանկացած անձ ինքնուրույն կարող է նույնականացնել որպես այդ ստեղծագործության մաս:

Հանձնաժողովի կողմից ուսումնասիրվել է վարչական վարույթի մասնակիցների կողմից ներկայացրած փաստերը, որոնք համադրվել են Ընկերության կողմից Հանձնաժողով ներկայացված ապացույցների հետ, որի արդյունքում հայտնի է դարձել, որ Հեռարձակողը ոչ

սեփական տեսալսողական հաղորդումը՝ Ֆիլմերը հեռարձակել է դրա հեռարձակման իրավունքը հավաստող փաստաթղթերի առկայությամբ:

Այսպիսով, հաշվի առնելով այն փաստը, որ Հեռարձակողի կողմից ոչ սեփական տեսալսողական հաղորդումը՝ Ֆիլմերը հեռարձակվել են դրա հեռարձակման իրավունքը հավաստող փաստաթղթերի առկայությամբ, ուստի վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն արձանագրում է, որ վարչական իրավախախտման դեպքի կամ կազմի բացակայության հիմքով Հեռարձակողի նկատմամբ հարուցված թիվ 13 վարչական վարույթը ենթակա է կարճման:

Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին կետով սահմանված է՝ վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման հետևյալ հանգամանքների առկայության դեպքում՝

1) վարչական իրավախախտման դեպքի կամ կազմի բացակայությունը:

Վարչական իրավախախտումների վերաբերյալ ՀՀ օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝

1) վարչական տույժ նշանակելու մասին.

2) գործի վարույթը կարճելու մասին:

Գործի վարույթը կարճելու մասին որոշում ընդունվում է բանավոր դիտողություն հայտարարելու, նյութերը ընկերական դատարանի, ձեռնարկությունում, հիմնարկում, կազմակերպությունում և դրանց կառուցվածքային ստորաբաժանումներում ստեղծված՝ հարբեցողության դեմ պայքարի հանձնաժողովի, հասարակական կազմակերպության կամ աշխատավորական կոլեկտիվի քննությանը հանձնելու կամ դատախազին, նախաքննության կամ հետաքննության մարմնին հանձնելու դեպքում, ինչպես նաև սույն օրենսգրքի 247 հոդվածով նախատեսված հանգամանքների առկայության դեպքում:

Ելնելով վերոգրյալից և հիմք ընդունելով «Տեսալսողական մեդիայի մասին» օրենքի 10-րդ հոդվածի 3-րդ մասի, 13-րդ հոդվածի 3-րդ մասի և Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին կետի, 282-րդ հոդվածի դրույթները և Հեռարձակողի 2022 թվականի հուլիսի 12-ի գրությունը՝ Հեռուստատեսության և ռադիոյի հանձնաժողովը **որոշեց**.

1. Կարճել «ՓԻ ԲԻ ՍԻ» ՍՊ ընկերության նկատմամբ հարուցված թիվ 13 վարչական վարույթը:

2. Սույն որոշումն ուժի մեջ է մտնում այն վարչական վարույթի մասնակիցներին պատշաճ ձևով հանձնելու օրվան հաջորդող օրվանից:

3. Սույն որոշումը կարող է բողոքարկվել ՀՀ վարչական դատարան՝ ուժի մեջ մտնելու օրվանից երկամսյա ժամկետում:

ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ

ՀԱՆՁՆԱԺՈՂՈՎԻ ՆԱԽԱԳԱՀԻ ՊԱՇՏՈՆԱԿԱՏԱՐ՝

Վ. ՕՀԱՆՅԱՆ

14 հուլիսի 2022թ.

ք. Երևան